

# LES MALEÛRS DU SINT DJANGOÛ.

Conte ardennais – Gaston LUCY, Bive.

Vous savèz bin ku ddins l'timps, vlà 1000 ans d'ça et co pu, les rlikes du Sint Djangou ont sté apwârtées à Djèdine p'âs mwanes ki s'sâvint adon dul radje des Normands, et k'c'est à cåze du ça ku Dgèdine è manké d'tchandjî d'nom. IL î fjot bramint des mirakes et les djins djint : « Dju vons à Sint Djangou » putot ku d' dire : « Djus vons à Djèdine ».

Sint Djangou astot in bin bon sègneur ki provnot du dlé les sources dul Mûse.(*Meuse*). Et adon coume anute, les chefs et les richards fujint la noce tous les djoûs. Pour zès, c'ère dimadje tous les djous : i n'travayint jamwès ; les serfs èstint la pou ça. (Vous wèyèz ène difèrance, vous, anute ?)

A l'èpoke ku dj'câzans, Djangou astot l'pus ritche du payis. Il ére eureû avu s'bê tchêstê, ses hectares du tchamp, tous ses bwès pou tchêssî, èt pî ène fame ki lî plêjot. K'ârot-i falu d'pus pouz èsse contint ?

I gn'avot pourtant in « mès », ku nosse Djangou n'counichot nin. Ça arive cand onz è ène bèle fame ! La sin.ne n'astot jamwê grigneuse, ile fujot fwârt bin la marinde èt n'alèz nin crwâre k'ile ére twârdue û crawieuse, avu des fâsses dints û ène bosse sul dos ; Non, rin d'tout ça ; à contrêre, c'ère ène bèle djin, mès hypocrite et sournwaze et sa pôve âme ére bin nwâre, savèz, bin nwâre ! Ç'astot la fame du djabe, kwè !

Dju v' va dire : Drè kul Djangou astot al tchêsse, i gn'a vnnot in djon.ne machin û l'ôte tunu compagne al donzèle et is n's'anoiyint wêre, da, tins kul Djangou tchêssot. Çu n'ère nin toudi les min.mes, savèz. Il à vnnot d'lon, et nin toudi des djon.nes. La donzèle s'avot don fwêt in pakèt d'pratikes, ki s'vantint partout k'ile ére fûz-èt-oûte (*très accorte*).

Il è don falu in djoû ku l'curé s'à mèle et il è vnu raconter ou Djangou cè k'i s'passot ; et l'ôte a-n è tumé du cièl al tère, à raviêr, coume on dit. I n'vlot nin cwâre lu curé ; i djot k'cère dès mèchançtés et des cançans d'mâvêzes langues.

La fame, lîe, jurot ses grands dieus ku tout ça astot des mantrîes, des ragots d'djalouzrie et k'ile plot l'jurer pa tous les sints dou Paradis.

Coume vous l'wèyèz, c'ère ène vrêye fame du djabe et ile fujot tout c'k'ile plot pou êdî l'pôve Djangou à prinde des sayès pou des lanchênes et c'èst nin ça ki la jin.not .

Lu Djangou, loû, k'ère ène oume pâjûre, n'inmot nin tous ces bruts là et il è don avalé tout c'ku sa fame lî rabriolot. Mès, dins l'fond d'loû-min.me, il avot cand mâgré tout des doutes .I rmârkot k' les djins ryint su s'passadje, k'on câzot tout bas cand il avot l'dos toûrné et il atindot dire ku les coumères èstint mwêjes du vèy filer leus galants.

Lu curé è dont ruvnu al tchêdje et il è cârémant dit ou Djangou k'il astot cornard, et k'i frot bin d'wârdèr sa fame k'astot an trin d'dâner tous les oumes du payis Ç'côp-ci, la colére è monté à l'oume, mès il ére putète djà târd. Il è outchî la fame, lî è câzé bin douçmint, l'è pris pal mwin èt l'è amon.né dlé la fontin.ne du viadje.

Arivés dlé l'batch, Dangou è dit à sa fame : « Pisku z'ôz juré pa tous les Sints du Paradis et co d'ôte pârt ku z'astîz inocinte, lu Bon Diu va dner s'n'avis su vosse condwite ; Trimpèz vosse bèle blantche mwin dins la fontin.ne et l'grand Mwêsse nous dirè kwé !

La fame su dit : Lu bon Dju nu put z-èsse pîs k'les sints, alanz'î !

Ile n'avot nin co la mwin à l'êwe ku c'ticile s'è covru d'in mâ si lèd à vèy, ku l'Djangou s'è dustoûrné à fjant in grand signe du Crwâ. I gn'è yu in grand potin et l'Djangou n'è pus vû k'in trô al tère avu in pô d'fumîre ki rêchot. Lu djabe, k'avot pris les trêts d'ène bèle fame ? vunot du rmoussî à l'anfer.

Et du ç'djoû la, Djangou è duvnu l'patron d'tous les mâs mariés, des cocus, des cornards et des r'calés. Ostant dire k'il est l'patron d'bramint !!!

Gaston LUCY.